



O Volapükaf lens Löfik !

Ekö obs, kels stanobs fo yan yela nulik! Yels pasetikons vifiko, no-li?
ed alikan obas nu labobs yeli nog bali !

No glömonsös jenoti vetitikün, kel ävotöfon kulivi obas, sevabo : moted
cila godik bü yels mödik. Etuvob vödis sököl, kels mebons obis dö sinif
Kritidazäla :

Slipö! o cil !
su motablöt olik.
Lesöl tala, mela, süla;
binos svidik ad logedön
Oli in plad somik.

Gelogolsös nu sui yel pasetik :

Ün febul, flen *Reinhard Hauptthal* äbükom samädis valik gaseda
"Zü Vol Lölik" (1888-1892) - keblünöt mu völadik jenave Volapüka.

Ün mázul, flen votik in Laustralän sevabo : *Neil Gillard* äsludom ad
klavön gramati ela *Harrison* ini nünöm omik ad kipedön Volapüki rigik -
keblünöt nog bal jenave Volapüka.

Ofinükob gelogami reta yela ün yel nulik.

Valikosi Gudikün sedom Oles ed Olikanes

sedom

Ralph

PLIN SMALIK (XXV)
FA ANTOINE DE SAINT-EXUPÉRY

"Mens," äsagom plin smalik, "ninikons ini vifatrems, ab no plu sevons utosi, kelosi sukons. Tāno muifikons e tulons sirkūliko . . . "

Ed ālūūkom:

"No vōlados tōbi . . . "

Fonād, keli ārivobs no āsūmedon fonāds Saharānik. Fonāds Saharānik binons hogs balugik ini sab pesebōls. Et āsūmedon fonād vilaga. Ab no ādabinon us vilag, ed ākredob, das ādrimob.

"Binos bisarik," āsagob pline smalik, "valikos binon blūmik: pulit, bōket e jain . . . "

Āsmilom, ādoatom jaini ed ājāfidūkom puliti. E pulit āhagon ās vienijonian vōnik, ven vien eslipon lunūpo.

"Lilol," āsagom plin smalik, "galūkobs fonādi at e kaniton . . . "

No āvilob, das ātōbidom.

"Leadolōd obi dunōn osi," āsagob ome, "binos tu vetik pro ol."

Nevifiko ātovedob bōketi jū fonādastron. Āfīmūkob oni us fimiko. In lils obik āfōvon kanit pulita, e, in vat, kel nog ādremon, ālogob, das sol ādremon.

"Soafob dō vat et," āsagom plin smalik, "givolōs obe ad drinōn . . . "

Ed āsuemob utosi, kelosi isukom !

Ālōūkob bōketi jū lips omik. Ādrinom, ko logs fārmik. Ābinos svidik ās zāl. Vat at ga ābinon votikos, ka fid. Pāmoton de gol dis stels, de kanit pulita, de tōbid bradas oba. Ābinon gudik pro lad, ās legivot. Ven ābinob pul smalik, lit Kritidabima, musig māsāda zeneitik, svid smililas ādavedūkons so stralami lōlik Kritidalegivot, keli āgetob.

XII:91:2001

"Mens lä ol," äsagom plin smalik, "kälons rosadis lulmil in gad bal . . e no tuvons us utosi, kelosi sukons."

"No tuvons osi," ägespikob . . .

"E too, utos, kelosi sukons, kanonöv patuvön in rosad te bal u in vat bosik . . . "

"Fümö!" ägespikob.

E plin smalik äläükom:

"Ab logs binons bleiniks. Zesüdos ad sukön me lad."

İdrinob. Änatemob gudiko. Sab, tü delaprim, binon mielakölik. Äbinob i läbik dö mielaköl at. Kikodo ämutob-li senön glifi? . . .

"Mutol kipön promi olik," äsagom obe nelaodiko plin smalik, kel dönu äseadom nilü ob.

"Promi kinik?"

"Ya sevol osi . . . musuli pro jip oba . . . gididob tefü flor at !"

Ätirob se pok obik skätis obik däsina. Plin smalik älogedom onis, ed äsagom smilölo :

"Els 'baobab' ola sümedons boso brasidis . . . "

"İo !"

Ob, kel äbinob so pleidik tefü els 'baobab' !

"Renar olik . . . lils onik . . . sümedons bosilo honis . . . e binons tu luniks !"

Ed äsmilom dönu.

"Binol negidik, manül smalik, äsevob ad däsina nosi plä boins färmik e boins mailik."

XII:92:2001

"Ho ! atos osaidos, cils sevons."

So ädäsinob me stib musuli. Ed älabob ladi tomik ven ägivob oni ome.

"Labol diseinis, dö kels sevob nosi . . . "

Ab no ägespikom obi. Äsagom obe :

"Sevol-li osi ? . . . Odelo obinos yelamadel fala obik sui Tal . . . "

Poso, pos seil, äsagom dönu :

"Ifalob vemo nilü is . . . "

Ed äredikom.

E dönu, nes suemön kikodo, äplakob glifi bisarik. Too säk semik äkömon obe :

"Täno, no binos fädo, das, ün göd, kü esevädükob oli, bü dels jöl, äspatol so, soaliko, fagü liöls mil de topäds pepöpöl valik ! Ägekömol-li lü pün fala olik ?"

Plin smalik äredikom nogna.

Ed äläükob, zögiko :

"Ba-li kodü yelamadel ? . . . "

Plin smalik äredikom dönu. Neai ägespikom säkis, ab, ven redikoy, sinifos 'si' no - li ?"

"Ag !" äsagob ome, "dredob . . . "

"Anu mutol vobön. Mutol gegolön lü cin ola. Stebedob oli is. Gekömolös osoaro . . . "

Ab no äbinob petakedüköl. Ämemob renari. Riskoy ad drenön boso üf eleadoy oki peteimön . . .

TIFAN E KOEFAPATÄR

Tifan äkömom lü koefapatär ad koefön sinis mödik oka, e ad getön pardi.

Koefapatär seadom su stul okik e dalilom gudälo, du tifan koefom sinis mödik lönik.

"Kisi edunol-li, o son oba?" säkom koefapatär.

Otüpo tifan logom, das koefapatär lenlabom in pok oma jiläta pokagloki goldik. Tifan tifom oni, nen das koefapatär sevedom osi.

"Tifob," tifan gespikom.

"So no mutol spikön. Sagolös : etifob."

Nu tifan ya nüpladom pokagloki ini pok oka.

"Etifob," lesiom.

"Si, gudö! o son obik. Nu mutol gegivön utosi, kelosi etifol."

"Ol, vilol-li labön oni ?"

"No! mutol gegivön oni dalabane."

"Ab dalaban no vilom labön oni."

"Tän gololöd in püd. Sins olik pepardons."

● ● ● ● ● ● ● ● ● ● ● ● ● ● ● ●

SPIKOT

Manš mekoms domis, ab vomš mekofš lomis.

DOM IN KLERÄTALUSÜT (5)
Koned fa el Johann Schmidt

Söl Hausenstein fövom lifajenotemi oma

Ûn yels balid züölanef* nulik in läns at, kels vöno äbinons as topäds klatik koultima, leno äkanon flunön obi; no ädemob oni. Ven ye poso äreafof ini kosäd nemedik ko länans usik, äküpob suno, das gerot at se vön no nog inepubon lölöfiko. Vütimo dins somik äkanons fasilikumo glepädön obi, ibä deadam jigama obik ivotükon binäli oba; icenob ad men letikik dasenälik. Äletikob nu lunüpiko dö dins glumälik ut, kelis mens votik i bo betikons, nendas ye dub jäf tu lunüpi somik operons timi pro dins jenöfik lifa. Dub atos äreafof e lü lumens cütik ut, kels komädons lä sütaguls u su maketpiads, e lü votikans, kels ävitons dredäliko jonetükami alik, kels ye pla at älofons duinotis* bluvüköl.

Maläd badik mota obik äkodon fino getävi oba lü Deutän, kö ävobob in lezif, dese kel äkanob suvo visitön palis obik. Dü yels lul äblibob in cal at. Vütimo pals oba ideadons, blod oba ilovesumom glunidalaboti, ed ob piglepädob dönu fa täviäl.

Ästadob ùn lifayel foldegkilid, e ven pöt älofon obe ad kompenön lä vestigatäv ini Lindän, no äzogob. No vilob seilön dö jenöfot, das us ikimob pö plösens ömik fakiras. Ab to dins klänöfik valik, to käfeds hestik mödik äcedob dinis valik at magivakäfedis labü greds difik bai fäg fakiras u hestanas tefikas. Dalob-li konön ole lifotis anik, kels ädutons lü dins neskilikün jäfüda at?

In zif Damaskus pilüspikob fa man lä sütagul iseadöl. Pos preparas kösömik pö dins somik, äлилob "büosagi" oma: "No binölös lügik, o foginan!" äsäyom. "sevob osi, suno odönulogol ofi; sevob osi."

Mutob-li sagön ole jenöfoti, das i pö mens at jäfüdisev semik muton dabinön? Seiv* lekläravifik lüspikäba binon leigo veütik äsä nün nefümik nenvöladik bidü nüns pö horoskop kösömik. Ven pos yels mödik in lomän, in teatöp pötü plösen ela 'Luflad pebreiköl' fa hiel

Kleist, älogob jiplösenani seimik, kel älabof logoti leigik äsä jigam deadik oba, ätikob nenvilädiko dö hibäldan in 'Damaskus' ed äsmilob ladöfiko.

In zif 'Kalkuta' äleadob slüdüön obi, ad kompenön pö plösen fakira semik, tefü kel ikonoy obe dinis stunidabik. Ün prim duinots oma äbinons ye somo pöfädiks, das ob, bi ya ilogob plösenis mödo gudikumis, äsmilob laodiko mö naed bal as balikan bevü komans ästunidöl. Calablode Deutänik oba, kel äseadom nilo näi ob, änotük-ob krüti vemo badiki. Obs bofiks äseadobs go föfao fo boedaskaf* donik, su kel fakir, man bäldik labü lifayels zao : 75, äjonom käfedis oka. Pos smil oba e pos spik laodik, fakir älüödükom logedi zunik äi ob, täno ye älaivobom e no fovo ädemom obi. Posä idunom foviko sperimentis brefüpiik ko komans votik anik, älülogom obi ön pladam föfio päbiegädöl, e me nams ön mod bisarik pätenüköls; täno äsagom me Linglänapük badiko päspiköl: "OI - Fransänan - Litaliyänan - Linglänan - nö! Deutänan! Kömolös löpio!" Äbestepob boso faviko skafi, e nu äfrutidom obi as drefäb* käfedas omik.

Äjenükom*, das flors ädavedons* fo ob, ed ädesumom hestiko dinis bisarikün se herem oba, de flom e de tämeps obik. Pö atos luman* at - kredob, das nem oma ätonon : 'Dinkah' - älülogom obi somo bisariko ed äspikom nenropiko vödis pö ob nesevädikis, so das äreafob ini kofud vemik, e leno äkanob tuvedön käfedis oma. Äfredob vemo, ven fino dönu äseadob dono lä flen oba. Klülos, das - äsä ya esagob - elogob in tops votik duinotis stunidabik; ikomob, ven fakirs ästepoms ve su ferabems* glutik; ab ced negönik tefü dins somik no ävotikon.

Zao mö vigs tel pos lifot at, älüvobs Lindäni. Älifob balido dönu dü yel bal in lomän oba, e poso täv gretik lätik oba äjenon. Topäds nilü nolüdapov äbinons as zeil täva. Is, in Lalaskän, su Laleutuäns e nilü melasüt* di 'Bering' ätuvob pöti, ad seivön syamanis* e deadanakulti bisarik omas. Kludo odasevol, das migot pemik binü süds e kösömots difiküns ininükon oki ini kap oba. No ye vilob votükön modi kona obik, e nu disein jenöfik visita obik ojonon oki. E pö dinäd at dins lofons kompliti vemik. Ab lilölös koni fovik!

XII:96:2001

Ya ün dels balid steba obik in lomän, pädfefob fa drim bisarik. Drimo äbinob in dom seimik in lusüt bäldik: näilusüt* in kuls filätasümik harata bäldik seimik. Elogob atosi valik kuratiko so, äsä konob osi ole. Ästanölo lä fenät älogob lusüti at bevü glügs tel in niläd. Tāno älogob flumedi klilik, kel äbeiflumon no fago de lusüt. Poso älogob magedi* voma keinik, kel ve lusüt änilikof äl ob, e kel äglidof obi me svön* pokasärvätüla ofik. Dido no sevob, va vom at äleigof leigodü jigam deadik oba, ibä klotem ofa äbinon vönädavogädik, e stadi ot äküpob i tefü klotem lönik oba. Benö! ebo ävilob vokädön nemi jigama, ven süpiko ägalikob. Plödo munaneit klilik äbinon. Klülos, das no äcedob drimi at dini siämöfik, ibä räyun* ona äbinon so Yuropik, äsä ob ito dönu pos yels mödik nekoma obik. Dins tel ädavedükons ye stuni pö ob. Balido magäd patik e dulöf patik drima at äbinons as dinäds bisarik. Pats valik drima iblebons in mem oba. E tāno ätuvob nilo lä bed oba bali pokasärvätülas nämik, labü siem stripik. Jigam oba inägo ed ilegivof onis obe bü yels mödik. Bo idofalon dese kapakusen dub slip netakädik ün neit munaklilik. Fäd at - so ol änemol ga atosi, ed i ob änemob osi so ün ettim - fäd at tefü pokasärvätül bevü drim e jenöf ifomon pato magädiko drimi at. Esagob ole te stadädis ledinik drima; ba idulon te mö sekuns anik, ab log dudranon lekläravifiko ini züamöp nilik. Alo no äkanob glömön drimi at."

"O söl löfik!" äsagob, äropöl omi. "Ecedol-li jenöfiko drimi at dini veütik? Okanoy ga fasiliko plänön süfüli tefü pokasärvätül. Elogol oni in stad lafogalik, e so finasüfül drima olik edavedon. Vom in drim ädavedof niludiko dub jigam deadik ola, e dom binon as dom seimik in zif seimik."

"Ettimo id ob ätikob atosi, o söl dokan!" el 'Hausenstein' ägespikom. "Jūs pos yel bal - ün tim at älifob ya in Lalaskän - drim telid äsökon, kel äleigon kuratiko leigodü drim balid; äbinob in dom ot, in lusüt ebo ot, e te pokasärvätül ädefon."

"Ekö! o söl dokan!" ävokädob smilölo.

Nen dem ropa obik, el 'Hausenstein' äfövom fefiko koni oka: "Sis tim at ebelifob drimo magodis leigik mö naeds tel u kils ün yel alik.

Klülös, das vü drims at edrimob dinis kofudik, kelis ye dönu eglömob. Drims patik at äjonons fe pianiko cenis ömik, kelis verätiko äküpop pas pos tim ze lunik. Süfüls votik at äcenons dono lü flumed, lü maketapläd u lü lusüts labü fuläd menas, ömna i lü runädaplads. Prim e fin drimas at äjenons ye ai in dom bäldik at. Balna älogob domi bäldik igo te dese top plödik; ästanob in fagot bosik de lusüt bäldik. Süpiko äküpop lefogi vemo gretiki; no kanob sagön, va äbinon as püfalefog u as smokalefog; ven ye inepubon, äküpop, das lusüt lölik äseaton as failotakum gianagretik lo ob."

BOADASKAF	a platform	LUMAN	a scoundrel
DAVEDÖN	to appear	MAGED	a form
DREFÄB	a (human) subject	NÄILUSÜT	a side alley
FERABEM	an iron beam	RÄYUN	a distinctive characteristic
JÄFÜD	a field (of knowledge)	SEIV	recognition
JENÜKÖN	to bring about	SYAMAN	a shaman
KÄFED	a trick	ZÜÖLANEF	people surrounding (the writer).

DÖ ARISTIPPOS, FILOSOPAN...

Äsākoy eli *Aristippos*, filosofani, lio distoms filosofans de mens votik. Ägespikom: "If lons alik pöfinidonsöv, te filosofans ölifoms äs büo."

Ek ätaon osi, das tuvoy filosofanis suvo fo yans liegikanas. El *Aristippos* ägespikom: "Leigo äs sanans fo yans malädanas - sekü atos, malädans, binons-li lestümikums, ka sanans?"

"Moni," äsagom, "sumob de liegikans, no bi neodob oni, ab sodas liegikans sevonsös vio kanoms dagebön oni."

MEMS AI NULIKS

Äbinos büsoar Kritisazäla. Famülans äseadons zü Kritisabim, ed ästebedons nesufädiko glokatoenodi zeneitik.

Plödo nif äfalon nevifiko, e pianiko ätegon gluni. Stels mödik ästralons in sil jönik.

Äkanitoy Kritisalidis kösömik ed alikans äbinons läbiks.

Jiel *Marian* id äseadof us ko cils smalik, e su blöt äkälöf putüli nulik.

Äbinos vönaoloveikod lunüpi. Äkanof kliliko memön jenoti at ven id of äbinof yunik; pals e gems ästebedons leigüpo glokatoenodi; pos yels nog degfol id äkanof tiko logön matani, kel äseadom flanü of, e kel äkanitom ko vög nämik kobü retans.

Dels et äbinons nu mo, ab mem onas verato äbinon svidik. No ga ädotof, das cils at, pos yels nog mödikums, ödunons ebo ot, e lad oka päfulikon me püd gretik.

E nu älilons gloki, kel iprimon ad toenön : bal, tel, kil . . .

Cils smilons; pals kidons onis. Kritisazäl eprimon !

Fatül golon lü bim, kel nidon me nidüladekils e lektinakandels, e se-givom legivotis alikanes. Alans binons läbiküns.

Nu kanoy blinön boadakribi miniatürrik, keli iködom dalefat motik bü yels mödik, kobü hobub, cuk, jipagaledans, jiel *Maria*, hiel *Iosef* - e cil godik ! Kribi at pikipedon fa famül plu ka yels tum: äbinon div neplaädovik.

E ko drens in logs, äkanitons nu Kritisalidi te bali büä ägolons lü bed: "Neit seilik, neit saludik - Kristus, Savan pemotom ! Siö ! Kristus, Lesavan pemotom !!



XII:99:2001

SAKRIFOT LÖLÖFIK

Jigok e hisvin pävüdon s lü mated.

Äbespikons kobo legivotis, kelis ösötons givön games.

Jigok, pos tikod vifik, äsagof :

"Ob esludob ad givön nögis mäl games."

Hisvin no äkanom tikön so vifiko äs jigok. Kodü atos, äsagom :

"Ob no sevob nog utosi, kelosi ogivob games äs legivot.

"Labob tikamagoti gudik," ägespikof jigok. "Ob ogivob, äsä ya esagob, nögis mäl. Ol kanol givön flani svinamita."

Ab lekläravifiko ävokädom hisvin :

"Atos no binos gldik, bi pro ol tefon te legivoti, pro ob too tefon sakrifoti lölöfik !



SPIKOTS ANIK

No kanoy seadön su stuls tel.

Spikön binos fasilikum, ka dunön.

Ven renar predon sufäli, galedolsös ganis olas.

Deadans guverons lifanis.

Utan, kel ai primon, neai finükon.

VOLAPÜK VALÖPO VEÜTIK

FA BRIAN R. BISHOP

Redakan digik obas gudäliko ebegom obe, das öpenob bosi pro nüm kritidik gaseda omik - nö, obsik. Kisi ödunön?

Ätikob dö pük e sirkülapenäd, e nemediko älogob in nems kapik veratis, kelis neseimo büo ilogob. Ekö!

Volapük - güükolös tonatis. "Küpalov" (= Küp+a+lov). Atos suemos "*Sustan logäda*"; medü pük obsik logobs, küpobs voli de plad löpikum, ba löpikün. Din vemo veütik.

Vöd telid tiäda binon "Valöpo". Güüköl, vöd binon "Opölav" (= O+pöl+av). Fümiko - binon *nol midunas e mitikodas fütürik*.

Vöd kilid binon fikulikum: "Veütik". Us dabinon güiko "kit" e negüiko "veü" (= ve+ü), kel nendoto suemon "*bai utos, kelosi getoy*".

Kodü atos kanoy fasiliko e suno logön, das pük obsik givon pükanes okik pladi süperik ad büiko neletön dobis voto okömöl, bai givot Volapüka.

Jenöfo esenob, das, ven tikob medü Volapük, kömons lü ob tikods dibikum e ba veratikum. Sekü atos, begob oles, Volapükanes, das otikolsös Volapükiko du Kritidazäl, sodas ologols i läbis säsuma i benosekis püka bevünetik Volapüka, kel, igo üf pük votik nu söti e bligi labon, vegi ejonon ad suem bevünetik.

Kritidi läbik valikanes !

* * * * *

SPIKET

LÖF BINON ÄS LIF : MEKON DATUVALIK